

# Ilitsersuut

7. klassimi  
aalajangersimasumik sammisaqarluni suliaqarneq



## Siulequt

Matuminnga ilitsersuusiordermut siunertaavoq 7. klassimi aalajangersimasumik sammisaqarluni suliaqarnermut piunasaqaatigineqartunik ersarissaanissaq itisiliinissarluk tak. *Atuarfimmi naliliisarneq upperarsaasiortarnerlu pillugit Namminersornerullutik Oqartussat nalunaarutaat nr. 2, 9. januar 2009-meersoq.*

Siunertaavortaaq 7. klassimi aalajangersimasumik sammisaqarluni suliamut piunasaqaatit aamma atuarfimmi siunertat tunngaviillu, alloriarfinni siunertat, atuartitsissutit siunertaat ilikkagassatullu anguniagassat akornanni ataqatigiinnermik ersarissaanissaq, tak. Namminersornerullutik Oqartussat nalunaarutaat nr. 16, 24.juni 2003-meersoq.

Aalajangersimasumik sammisaqarluni suliaq atuarfimmi 7. klassimi atuartut tamarmik pinngitsooratik ingerlatassaraat.

Aalajangersimasumik sammisaqarluni suliaqarnermut pingaarnertut siunertaq marloqiusamik tunaartaqarpoq, tassalu **aalajangersimasumik qulequtsiilluni suliaqarnermi suleriaatsimik** atuineq nukit-torsaanerlu, soorlu Atuarfik pillugu inatsisartut inatsisaat nr. 15, 3. december 2012-imeersoq, § 10, imm. 4-mi allassimasoq: "Alloriarfinni tamani atuartitsinerup ingerlanneqartup ilaa atuartitsissutit akimorlugit ingerlatsinertut, aalajangersimasumik qulequtaqarluni sammisaqartitsinermi piareersariikkanillu anguniagaqarluni atuartitsinertut ingerlanneqassaaq", aammalu ilaatigut atuartut namminneq suli-aannik atuartitsinermilu pissarsiaat siamasinnerusumik nalilerniarlugit naliliiviginiarlugillu.

Aalajangersimasumik sammisaqarluni suliaqarneq, atuartup akullerni atuarluni naammassinerani ilikkagassatut anguniagassani piginnaasaanik ilisimasaanillu takussutissiissaaq, ingammik atuartitsissutit alloriarfinni misilitsissutaaneq ajortut, aalajangersimasumik sammisaqarluni suliaqarnermut ilaatillugu suliaq naammassisaaq aalajangersimasumik qulequtsiilluni suliaqarnernermut ilanngunneqarsinnaasarmat.

7. klassimi aalajangersimasumik sammisaqarluni suliaqarnermi periuseq suleriaaserlu aalajangersimasumik qulequtsiilluni suliaqarneruvoq, taamaallunilu aalajangersimasumik qulequtsiilluni suliaqarnermi suleriaatsimut ulluinnarni atuartitsinermi ilikkartitsiniarnermut aallarniissutitut periusaasinnaalluni.

Peqatigitisaanik 7.klassimi pinngitsoorani suliassaq ulluinnarnilu aalajangersimasumik qulequtsiilluni suliaqarnerup periusaanik atuartitsineq, 10.klassimi aalajangersimasumik qulequtsiilluni suliaqarnermi inaarutaasumik misilitsinnissamat aqutissiussipput.

### ***Atuarfimmi naliliisarneq upperarsaasiortarnerlu pillugit Namminersornerullutik Oqartussat nalunaarutaat nr. 2, 9. januar 2009-meersoq:***

Aalajangersimasumik sammisaqarluni suliaqarneq

**§ 29.** Aalajangersimasumik sammisaqarluni suliaqarneq atuartitsissutit atuartitsissutilluunniit qanitariissut arlallit ilikkagassatut anguniagassartaannut tunngasuussapput.

**§ 30.** Klassip imaluunniit atuaqatigiiaat ilinniartitsisuisa atuartut suleqatigalugit pingaarnertullugu sammineqartussaq ukiut tamaasa 1. februaari nallertinnagu aalajangiutissavaat. Sammisassaq ima atitutigisumik oqaasertalerneqassaaq atuartitsissutit arlallit atorlugit qimerloorneqarsinnaassalluni.

*Imm. 2.* Pingaarnertullugu sammineqartoq sammineqartunut annikinnernut aggulunneqarsinnaassaaq atuartitsissutit atuartitsissutilluunniit qanitariissut arlallit imarisaannik periaasiinillu

aamma atuartunut tamanut unamminartuusunik suleriaasiinik saqqummiusseriaasiinillu imaqarsinnaassalluni.

**§ 31.** Klassip imaluunniit atuaqatigiiaat ilinniartitsisui immaqalu ilinniartitsisut allat aalajangersimasumik sammisaqarluni suliaqarnerup ingerlanera tamaat atuartunik suliamut tunngatillugu ilitsersuissapput.

*Imm. 2.* Ilinniartitsisut ilitsersuinerata atuartut ataasiakkaat nammineq sapinngisatik soqutigisatillu aallaavigalugit makkununga tunngatillugu sulinissaannut periarfississavai:

- 1) sammisassap ataatsimik arlalinnilluunniit apeqqutitaqartup erseqqissarnissaanut,**
- 2) aalajangersimasumik sammisaqarluni suliap imarisassaanik killiliinermut,**
- 3) suleriaatsinik misissueriaatsinillu toqqaanermut atuinermullu,**
- 4) atuartitsissutit arlallit imarisaannik periaasiinillu toqqaanermut atuinermullu,**
- 5) najoqqutassarsiorfissanik atortussanillu toqqaanermut atuinermullu,**
- 6) saqqummiusseriaasissamik toqqaanermut atuinermullu,**
- 7) pilersitassamik suliaqarnermut,**
- 8) saqqummiussinissap piareersarneranut saqqummiussinermullu.**

**§ 32.** Aalajangersimasumik suliaq aallartitsinnagu nalilersuinermit suut pingaarnerrutinneqarumaarnerannik atuartut ilisimatinneqareertassapput.

**§ 33.** Atuartut ullunik atuarfiusunik tulleriinnik 3-5-inik paasisutissanik katersuinermut, sammisap suliarineranut, suliamik inaarsarnerannut suliamillu tamakkiisup saqqummiunnissaanut piareersarnerminnut atugassaannik periarfissinneqassapput.

**§ 34.** Aalajangersimasumik sammisaqarluni suliaq, atuarfiup periarfissiissutigisimasaasa iluanni, qanoq ilusilerlugu saqqummiussinissaanik qanorlu ilusilerlugu ingerlateqqinnissaanik atuartut namminneq qinersimasaannik suliamik naammassisamik kinguneqassaaq.

*Imm. 2.* Atuartut suliaminnik naammassinninnerinut uiggiutiinnaarlugu saqqummiussisoqassaaq. Saqqummiussinermut ilaatillugu ilikkagassatut anguniagassanut toqqarneqarsimasunut tunngatillugu atuartup nammineq suliani nalilersussavaa.

**§ 35.** Aalajangersimasumik sammisaqarluni suliaqarneq atituumik allaganngorlugu naliliiffigineqassaaq.

*Imm. 2.* Allaganngorlugu oqaaseqaat makkuninnga naliliinerussaaq:

- 1) suliap ilinniakkatigut imarisaa, tassunga ilanngullugit atuartitsissutip arlallilluunniit iluini atuartup tunngaviumik ilisimasaminik pikkoriffiminillu qanoq annertutigisumik takutitsinera aammalu ilinniartitsissutinik pingaarnernik tamakkiisumik isiginnissinnaanera,
- 2) sammisamik suliaqarnerup ingerlanera, tassunga ilanngullugit atuartup sammisaminik itisilerisinnaassusia, atuartup ilaminik suleqateqarnera atuartullu sammisamut tunngasumik pilersaarusiinnaanera, paasisutissanik katersuisinnaanera suliarinneqqissinnaaneralu,
- 3) suliaq inigaq, tassunga ilanngullugit ilusilerneru saqqummiunneqarneralu,
- 4) imarisaata atuartumit sammineqartup, atuartup suleriaasiata suliallu inikkap ilusilernerata saqqummiunneqarneratalu ataqatigiinnerat.

*Imm. 3.* Aalajangersimasumik sammisaqarluni suliaq ilinniartitsisunit nalilersuiffigineqareersimassaaq kingusinnerpaamik saqqummiussinermiit sap.ak. marluk qaangiutsinnagit.

## Paragraffinut ataasiakkaanut oqaaseqaatit

### § 29

Atuartup saqqummiinermini atuartitsissutit arlallit iluanni atuartitsissutillu imminnut qanitariissuni ilisimasani pikkorissusinilu takutissavai. Piumasaqaat taanna isumaqarpoq atuartoq atuartitsissutinik aki-

muilluni apeqquitaritinneqartup akinissaanut suliaqassasoq, atuartitsissutinillu akimuineq sulinerup killif-fiini aamma saqqummiinermi ersissaaq.

### § 30

Sammisap pingaarnep oqaasertalersonera ima atitutigissaaq atuartitsissutinit arlalinniit qimerloorneqarsinnaassalluni, taamaalilluni atuartut assigiimmik sammisamik pingaarnermik suliaqartut isiginneriaatsit assigiinngitsut aallaavigalugit paasinninnissamut itisiliinissamullu periarfissaqalissammata. Sammisamik pingaarnermik toqqaanermi isumagineqassaaq atuartut tamarmik piginnaasaminnik atuiluarnissamut suliamillu naammassinnilluarnissamut periarfissinneqarnissaat. Taamaalilluni atuartut tigussaanagerusunik suliaqarnermut nukittuffeqartut suliamik naammassinninnissamut, atuartut allattariarsornikkut nukittuffeqartut periarfissaasa assinginik periarfissinneqassapput. Tamanna isumaqarpoq atuartut namminneq sulerusissaminnik toqqaanissaminnut periarfissaqartut, ukunani:

- Misissuineri, misileraanermi atortunillu atuinermi
- Paasisimasani ujaasineri (atuakkat, apersuinerit, filmit il.il.)
- Suliamik naammassisassamik suliaqarnermi
- Suliarisamik saqqummiussineri

### § 31, imm. 1 aamma 2

Ilinniartitsisoq (ilinniartitsisut) suliap ingerlanera tamaat ilitersuissapput, ilinniartitsisullu ilitersuineri suliap naammassinissaanut qitiuvoq. Ilinniartitsisup atuartullu akornanni oqaloqatigiinnerit aqutugalugit atuartut isumassarsiatik eqqarsaatitillu piukkunnarsassavaat.

Taamaalilluni ilinniartitsisup qulakkiissavaa atuartut sammisap ilaannik annikinnernik toqqaanermikkut misissuinissamut pilersitaqarnissamillu – nutaamillu ilisimasaqalernissamut periarfissaqalernerat.

*Assers. – atuaqatigiit **sammisaat pingaarnep**:*

*"Kalaallit Nunaata oqaluttuarisaanera – 1900-miit 1940-mut"*



### Nr. 1 – Sammisassap tunngavia

Sammisaq pingaarnep aallaavigalugu atuartut immikkut soqutigintaminnik sammisassamik tunngavianik erseqqissaassapput.

Atuartut tamarmik isumassarsinissaat isumassarsiorfissaqarnissaallu eqqarsaatigalugu killiffimmi tassani **mindmap** atorlugu suliaqarnissaq tulluartuuvoq.

Atuartut sammisap annikitsortaanut eqqarsaatinik pissutsinullu tunngasunik sammisaminnut ersarissaa-taasunik oqaasertalersuissapput.

Assers. – atuartut suleqatigiit A:

### **Sammisap tunngavia**


*Kalaallit oqaasiini aamma inuiaqatigiilerinermi atuar-nitsinni Knud Rasmussen tusarnikuuarpur, taannalu pillugu ilisimasasarsiornerillu ingerlattarsimasai pillugit ilisimasaqarnerulerusuppugut. Suleqatigiiulluta ilisimasasarsiorluni angalarnerit pillugit tusarnaassaluta soqutigisaraarput – ingammik Kalaallit Nunaata avannaani issittumilu pisunit.*

*Knud Rasmussenip angalanermini suna anguniarpaa sunalu pissarsiaraa?*

*Qanoq ittuni najugaqartarpat aamma inuit Avannersuarmiut Akilinermiullu qanoq oqaloqatigineqarsinnaasimappat.*

*Sunaana anguniarlugu inuit ilaat taama imminnut tamaviaartitsigisartut.?*

### **Mindmap!**



### **Nr. 2 – Killiliineq** (Sammisamut apeqqusiaq)

Ilinniartitsisup oqaloqatigenera ilitsersuineralu aqutugalugit atuartut suliaminni sammisassaminnut apeqqusiamik oqaasertalersornerani 'killissartik' toqqassavaat.

Tamanna suliap ingerlaqqinnissaanut aallaaviussaaq.

Assers. – atuartut suleqatigiit A:

**Sammisamut apeqqusiaq oqaasertalersornera**  
*Avannersuarmut ilisimasasarsiornerit tallimaat - qimussernersuaq.*

*Knud Rasmussenip angalanermit suna siunertaraa – aamma qanoq ingerlava?*



Arktiske billeder.dk

### **Nr. 3 – Suleriaatsit misissueriaatsillu**

Suleriaatsinik misissueriaatsinillu toqqaanermi ilitsersuineq suleqatigiit nukittuffiinik aallaaveqartinneqassaaq. Atuartut ilaasa misissukkap paasiarnerani atuakkianik atortunillu allatanik atuneq iluarinerusinnaavaat iluaqutigalugulu.

Atuartut allat paasissutissanik allatut ujaasineq pisariaqartissavaat – tigussaanagerusullu atorlugit misissuineq ingerlallugu.

Assers. –Atuartut suleqatigiit A:

### **Misissuineq**

*Misissukkamik akissutissartaat akissutiserusuppaat båndit tusarnaagassiat apersuinerillu aqutigalugit ilisimasamik paasissutissanillu ujaasinerikkut.*



### **Nr. 4 – Imarisat periutsillu atuartitsissutinit arlalinnit**

Isumassarsiatsialaasinnaavoq atuaqatigiit atuarnerminni sammisimasaannut tunngassutilimmik sammisamik pingaarnermik toqqaaneq, taamaallutik atuartut ilisimasassap nalungeriikkamik ilanngunnissaanut periarfissaqassammata – imarisaanillu itisiliinissaminnut.

Assers. – atuartut suleqatigiit A:

Atuaqatigiit kalaallit oqaasiini aamma inuiaqatigiillerni Inuit naggueqatigiit assigiinngitsut atassueqarfigiinnerat sammisimavaat – tassunga ilaalluni issittumi ilisimasassarsiorluni angalasarnerit.

Suleqatigiit ilisimasaq taanna inuiaqatigiillerinermut tunngassutilik nutaamik ilisimasaqalerusullutik atoruppaat apeqqarissaarlutik allattukkanillu allattuiner-mikkut (kalaallit oqaasiini)–kiisalu ilinniakkatik suliamik naammassisamik (sumiiffinni qinigassiissutit) iner-neqartikkusullugit.



### Nr. 5 – Najoqqutassarsiorfiit atortussallu

Ilitsersuinerup nassataraa ilinniartitsisup atuartut misissuinissaannut paasissutissanik naleqquttunik nassaarniarnerini ikiuinissaa. Najoqqutassarsiorfusinnaapput allassimasut kisianni aamma assers. paasissutissat filmineersuusinnaapput apersuiner-nilluunniit – atuartut suleqatigiit apeqquataalluinarlutik.

Atuartut ilaasa iluaqutiginerussavaat ilisimasassamik nutaamik ujaasigunik apeqqarissaarnerit katersugaasivimmullu pulaarnerit aqutigalugit, allalli atuakkanit internettimillu paasissutissanik ujaasisinnaapput.

Assers. – atuartut suleqatigiit A:

#### Atortut

Knud Rasmussenip meeraaneraniit (båndi immi-ussa)

Sumiiffimmi oqaluttuarisaanermik ilisimasalik (katersugaasivik)

Internetti – nunap assinga, paasissutissat piviusut il.il.



### Nr. 6 – Saqqummiusseriaaseq

Atuartut saqqummiusseriaatsimik toqqaaneranni siunnersuiner-mi naatsorsuutaavoq atuartut saqqummiusseriaatsit suliallu naammassisat assigiinngitsut ulluinnarni atuartitsinermi ilisimasaqarfigissagaat: videoklippit, aviisit, assilisat, assit qalipatat, karseeraliat isikkivilimmik inissisimaffillikat (perpektivkasser), isiginnaartitsinerit il.il.

Atuartut suliaat naammassisat suliarisimasaminnillu saqqummiussaasa imarisaat imminnut attuumasuteqassapput.

Assers. – atuartut suleqatigiit A:

#### Saqqummeeriaaseq

Atuartut toqqarpaat oqaluttariarsorluni saqqummi-inertut ingerlanneqassasoq – sivikitsumillu PowerPointimik atuilluni (ikorfartuutitut)

Suliamik naammassisamik saqqummiussineq nassuiaanerlu



## Nr. 7 – Suliaq naammassisaq

7. klassimi aalajangersimasumik sammisaqarluni suliaqarneq **suliamik naammassisamik tigussaasumik** (§34) – atuartunit toqqarneqartumik. kinguneqartinneqarnissaa piumasagaataavoq.

Assers. – atuartut suleqatigiit A:

### **Suliaq naammassisaq**

a. Knud Rasmussenip tallimassaanik Avanesuarmut ilisimasassarsiornermini aqutigisimasaanik takussutissaliorneq.

b. Atuartut ataasiakkaat tamarmik namminneq aarnuaat – Knud Rasmussenip oqaluttuai mallilugit suliat atuartullu nammineq "piginnaanis-saat" atorlugit.



## Nr. 8 – Saqqummiisoqarnera

Ullut suliamik sammisaqarfissatut immikkoortinneqarsimasut naaniariarpata saqqummiisoqassaaq. Imaappoq atuafik ullunik 4-nik suliamut immikkoortitsisimappat ullullu taakku ataasinngornermiit sisanngornermut inissinneqarpata, saqqummiineq tallimannngornikkut pissaaq. Atuafik suliamut ullunik 5-minik immikkoortitsisimappat sulinerlu ataasinngornermiit tallimannngornermut ingerlanneqarpata saqqummiineq ataasinngornikkut pissaaq.

Aalajangersimasumik sammisaqarluni suliaq ilinniartitsisunit peqataasunit atituumik allaganngorlugu naliliiffineqassaaq, saqqummiinermit kingusinnerpaamik sapaatit akunneri 2 qaangiuppata aamma pingaarnertut aallaavigalugit tulluullugit taaneqartut (§ 35, imm. 1 aamma 2):

- 1) suliaq ilisimasatigut imarisaa,
- 2) suliaqarnerup killiffii assigiinngitsut (itisilerineq, suleqatigiinneq, pilersaaruserneq, paasissutis-sanik katersineq sammisamillu suliarinneqqissinnaaneq)
- 3) suliaq naammassisaq, tassunga ilaallutik saqqummiuseriaaseq suliamillu saqqummeeriaaseq
- 4) suliaq naammassisap ataqatigiinnera ingerlateqqinneqarneralu'

## § 32

### **Nalilersuinermit tunngatillugu atuartunik ilisimatitsineq**

Atuartut suliaq aallartitsinnagu nalilersuinermit suut pingaartinneqarumaarnersut ilisimatinneqariissapput. Assersuutigalugu sammisaq pingaarnermi atuartitsissutit pinngortitalerinermit qanitalinnik imaqartut pineqarpata, taakkuussapput atuartitsissutit qanitariissut nalilersuinermit aallaavittut atorneqartut.

Assers. – atuartut suleqatigiit A:

**Naliliineq** suliaq naammassillugu pullaviginerani eqqumiitsuliorneq – suliaqarneq (praktisk – musisk) oqaluttuarisaanerlu aallaavigalugit ingerlanneqassaaq.

Suliaq naammassisaq tigussaasuvoq – atuartullu ilisimaligaat nutaaq saqqummiussernermit peqataatillugu takutinneqassalluni:

1. Kalaallit Nunaata aamma Canadap avannaasa nutataasa assitaat – Knud Rasmussenip angalanermini aqutigisaanik ilalik
2. aarnussat nammineq sanaat – Knud Rasmussenip sanalukkat katersarisimasai isumasarsiorfigalugit.

- **Inuiaqatigiilerineq (oqaluttuarisaaneq)**
- **Atuartitsissutit mernguernartut**

### § 33

#### Ullut 3-5 atuarfiusut

Atuartut suliamik ingerlatsinissaminnut ullunik imminnut ataannartunik atuarfiusunik 3-5-minik tuniqassapput. Tamanna isumaqarpoq skemaat piffissami tassani allanngortinneqassasoq, aamma atuartut aalajangersimasumik qulequtsiilluni suliaqarnermut ullut atussavaat ullut atuarfiusutut iluitsut, atuaqatigiit nalinginnaasumik atuaraluarunik akunnerit atuarfigisartagaasa amerlaqataanik. Taamaallutik atuartut sammisamik toqqarsimasaminnik ataannartumik suliaqarnissaminnut periarfissaqassapput.

Atuartut piffissami suliap ingerlannerani:

- paasissutissanik katersisimassapput
- paasissutissat suliareqqissimassavaat
- suliamik naammassisamik suliaqarsimassapput
- suliamik saqqummiussinissaq piareersarsimassavaat

### § 34

#### Suliaq naammassisaq tigussaasoq

Atuartut suliaminnut suliamik naammassisamik tigussaasumik suliaqassapput. Tamanna isumaqarpoq suliaq naammassisaq eqqumiitsuliaassaaq imaluunniit suliaassaaq naammassisaq. Atuartut ilisimasartik takutissinnaavaat assers. makku atornerisigut:

- Qalipagaq
- Tegneseriat
- Karsi isikkivilimmik inissimaffilik (Perspektivkasse)
- Isiginnaartitsineq
- Modeleq
- Qiperugaq
- Videoklippi



### § 35

#### Naliliineq

Aalajangersimasumik sammisaqarluni suliaq saqqummiinnermit kingusinnerpaamik sapaatit akunneri 2 qaangiuppata atituumik allaganngorlugu nalilerneqassaaq uku aallaavigalugit:

1. **Ilisimasatigut imarisaa** & atuartitsissutinillu akimuinera
2. **Suliap ingerlanera**
  - a. itisiliineq
  - b. suleqatigiinneq
  - c. piareersarneq
  - d. paasissutissanik ujaasineq
  - e. suliareqqiineq
3. **Suliaq naammassisaq** - saqqummeeriaaseq saqqummiusseriaaserlu
4. **Ingerlatitseqqinneq ataqatiginnerlu.**



**Atuartut saqqummiussinerminni nutaamik ilisimalikkaminnik takutitsinersut naliliinermi pingaartinneqassaaq – aamma misissuinerminni apeqqutigisatik akineraat (suliamik ersaris-saanermi apeqqutitaq)!**



---

## Innersuussinerit

**Projektimik suliniuteqarnissamut piareerpit? 1 & 2**, Betty Folino og Christina Hellensberg, Ilinniusiorfik 2006 (Danskisut saqqummernera: Projektklar?)

**Ilinniartitsisumut ilitsersuut. Projektimik Suliniarnissamut piareerpit? 1-2**, Ilinniusiorfik 2006

Atuakkat qulaani taaneqartut nutserneqarnikuupput ukunannga: Projektklar? 1+ 2. Atuakkani akullerni aalajangersimasumik qulequtaarluni suliaqarneq sammineqarpoq:

- Projektklar? 1 - 4.-5. klasse
- Projektklar? 2 - 6.-7. klasse

Atuakkat marluk tamarmik ilinniartitsisumut ilitsersuutitaqarput. Taakkunani ilinniartitsisup quppernermiit quppernermut ilitsersuutit saniatigut immikkoortut isumassarsiorfigisinnaavai mak-kununnga tunngasunut :

- aalajangersimasumik qulequtsiilluni suliaqarnertut suliaqarneq
- atuartitsinermik aqqissuussineq
- Portfoliomik atuineq – atuartumut ilinniartitsisumullu iluaqutaasumik !
- Logbogimik ingerlatsineq
- ilinniartitsisup – atuartup inissisimaffii
- anguniagaq, iliuusissatut pilersaarut naliliineq
- atuagassat aalajangersimasumik sammisallit atuaruminartut akullerni atugassat

**Projektarbejde / Projektilerineq**, Bent Mortensen, Ilinniusiorfik 2005

<b>7. klassimi aalajangersimasumik sammisaqarluni suliaq</b>		
<b>Suleqatigiit/Atit:</b>	<b>Klasse</b>	<b>Ulloq:</b>
<b>1.</b> <b>Sammisaq pingaarneq:</b>	<b>2.</b> <b>Sammisassap tunngavia:</b>	
<b>3.</b> <b>Sammisamik killiliineq</b> <b>(sammisamut apeqqusiaq):</b>		
<b>4.</b> <b>Misissueriaatsit periutsillu:</b>	<b>5.</b> <b>Najoqqutat atortullu:</b>	<b>6. &amp; 7.</b> <b>Saqqummeeriaatsit suliallu</b> <b>naammassisat:</b>
<b>8.</b> <b>Saqqummiussinissamik piareersaaneq:</b>		